

Morning Regional Dogri News Bulletin, 26 Feb. 2025

मार्निंग डोगरी न्यूज़ बुलेटिन, समे. 09.20 Hrs

<><><><><><>

Headlines

1. जम्मू-कश्मीर च आतंक निरोधी अभियानें गी तगड़ा करने दे मकसद कन्नै जम्मू च बड्डे सुरक्षा एहलकारें दी इक उच्चि सतह दी मीटिंग लगगी।
2. औंदे सोमवारें थमां रम्भ होने आहले बजट इजलास गी सुचारू ढंगै सिर तोड़ चाढने लेई स्पीकर होरें जरूरी प्रबंधें दा जायजा लैता।
3. हाई कोर्ट नै राश्ट्रीय जरनैली शिडक एन.एच-44 पर 2 टोल प्लाजें पर टोल वसूली घटाने दे निर्देश दिन्ते न।
4. पूरे जम्मू प्रांतै च अज्ज महाशिव रात्रि दा ध्यार धार्मिक जोश ते जज्बे कन्नै मनाया जा'रदा ऐ।
5. जम्मू-कश्मीर दिएं उच्चिएं धारें पर ताजा बर्फबारी, ट्रैफिक पोलीस नै मुसाफिरें दी सखल्ली आओजाई लेई एडवाइजरी जारी कीती।

<><><><><><>

Counter Terror

जम्मू-कश्मीर च जंदे मंगलवारें आतंक निरोधी बल दे मुख्यालय च इक उच्चि सतह दी सुरक्षा जायजा मीटिंग लगगी। मीटिंग दा मकसद जम्मू डिविजन दे बक्ख-बक्ख जिलें च सुरक्षाबलें बश्कार तालमेल ते उन्दे कम्में-काजें च दक्षता दे बाद्दे लेई सोच-विचार करना हा। आकाशवाणी जम्मू दे संवाददाता मूजब मीटिंग च डोडा, किश्तवाड ते रामबन प्रोतें च सरगर्म आतंकी ढांचें गी निस्तो-नाबूद करने लेई इक व्यापक तरीकाकार बनाने ते खुफिया जानकारी मता-मता सांझा करने पर विचार बटांदरा कीता गेआ। मीटिंग च सेना, जम्मू-कश्मीर पोलीस, सी.आर.पी.एफ ते खुफिया एजेंसिएं दे सीनियर अधिकारी मौजूद हे। मीटिंग च खुफिया जानकारी गी बेल्ले सिर सांझा करने आहले तरीकाकार गी तगड़ा करने पर गल्लकत्थ कीती गेई तां जे सुरक्षाबलें मझाटे आतंक विरोधी अभियानें नै निब्बड़दे लै ते आतंकी ढांचे गी खत्म करदे मौके मता-मता समन्वय यकीनी कीता जाई सकै। मीडिया आहलें कन्नै गल्ल करदे होई आई.जी.पी जम्मू होरें दस्सेआ।

<><><><><><>

Security-Budget

जम्मू-कश्मीर विधानसभा दे अध्यक्ष अब्दुल रहीम राथर होरें 3 मार्च गी रम्भ होने आहले औंदे बजट सत्र ताई लोडचदे सुरक्षा पबंधें ते होर दुइयें बवस्थाएं दी समीक्षा कीती। आकाशवाणी दे जम्मू संवाददाता नै दस्सेआ ऐ जे विधानसभा अध्यक्ष अब्दुल रहीम राथर होरें सुरक्षा तैयारियें पर इक्क व्यापक समीक्षा बैठक लाई ते सरबंधत अधिकारियें गी विधानसभा परिसर च संसदीय प्रोटोकॉल कन्नै शैल तरीके कन्नै वाकफ कर्मियें गी तैनात करने दे निर्देश दित्ते। अध्यक्ष होरें ट्रैफिक मैहकमें दे अफसरें गी निर्देश दित्ता जे ओहू जम्मू-कश्मीर विधानसभा परिसर, सिविल सचिवालय ते जम्मू च विधायकें दे होस्टल बक्खी जाने आहलियें शडकें पर गड्डियें दी आओजाई पर टकोहदा ध्यान देन।

<><><><><><>

CM-Budget

जम्मू-कश्मीर च औंदी 7 मार्च गी पेश कीते जाने आहले बजट दी तैयारी करदे होई मुखमंत्री उमर अब्दुल्ला होरें कल मंगलवारें सिविल सचिवालय जम्मू च मुख सरकारी मैहकमें दे अफसरें कन्नै बजट शा पैहले आहली बैठकें दी इक्क श्रृंखला दी प्रधानता कीती तां जे औंदे बजट दे प्रस्तावें गी खीरी शकल दित्ती जाई सकै। आकाशवाणी दे जम्मू संवाददाता नै दस्सेआ जे बैठकां इलाकाकार प्राथमिकताएं गी समझने ते इनेंगी सरकार दे विकास एजेंडे कन्नै जोड़ने ताई आयोजित कीती गेदियां हियां। बैठकें दौरान मुखमंत्री होरें इक व्यवहारिक ते विकास बक्खी लेई जाने आहले बजट दी लोड पर जोर पाया जेडा आम लोकें दियें आसें-तांगें मताबक ते अर्थ बवस्था गी मजबूत करदा होए। ध्यानजोग ऐ जे मुखमंत्री होर पैहले गै केंद्र शासित प्रदेश दे सब्भनं 20एं जिलें दे नुमाइंदें कन्नै व्यापक सलाह सूत्र करी चुके देन जिंदे च डीडीसी अध्यक्ष ते विधायक शामिल हे।

<><><><><><>

Toll-Revision

जम्मू-कश्मीर हाई कोर्ट नै राश्ट्री जरनैली शिडक-44 पर लखनपुर टोल प्लाजा ते बन टोल प्लाजा पर टोल घट्ट करने दे हुकम जारी कीते न। बक्ख-बक्ख अखबारें दस्सेआ जे मुख न्याधीश ताशी रबस्तान ते न्यामूर्ति एम.ए चौधरी हुंदी पीठ नै राश्ट्रीय जरनैली शिडक-एनएच-44 पर लखनपुर, इंडी खुई ते बन टोल प्लाजा टैक्स च छूट दी मंग करने आहली इक जनहित याचिका पर सुनवाई करदे होई दिल्ली-अमृतसर-कटडा एक्सप्रेस-वे दे निर्माण करी शिडकें दी हालत खराब ऐ-इस करिये टोल वसूली मुनासिब नेई ऐ। कोर्ट नै निर्देश दित्ता ऐ जे राश्ट्री राजमार्ग दे पूरी चाल्ली चालू होने तगर दौनें टोल प्लाजें पर टोल टैक्स च फौरी तौरा पर 80 प्रतिशत दी कमी कीती जानी लोडचदी। एहदे अलावा 60 किलोमीटर दे अंदर कुसै बी टोल प्लाजा गी हटाने दा बी हुकम जारी कीता गेआ।

<><><><><><>

CBSE

केंद्री माध्यमिक शिक्षा बोर्ड-सी.बी.एस.ई नै शैक्षणिक सत्र 2025-26 थमां 10मीं जमात लेई बोर्ड दे 2 म्तेहान आयोजित कराने दी मसौदा नीति उप्पर प्रतिक्रिया मंगियां ना। मसौदा नीति च सी.बी.एस.ई नै 2 चरणें च 10मीं जमात दे बोर्ड दे मतेआन आयोजित कराने दा प्रस्ताव दिता जेदे च पैहला गेड फरवरी शां मार्च तगर ते दुआ गेड मई च होगा। इस योजना कन्नै 15 फरवरी मगरा पैहले मंगलवार शां 10मीं ते 12मीं जमात दे मतेआन शुरू करने दा प्रस्ताव ऐ। सीबीएसई नै गलाया ऐ जे मसौदा नीति राश्ट्रीय शिक्षा नीति 2020 दी 2 सिफारिशें मगरा विकसित कीती गई ऐ।



Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओहू कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद् दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होगा। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।



ते हुन बाकि दिएं खबरें कन्नै पंकज कोहली।

Mahashivratri

जम्मू खित्ते च शरदा ते उत्साह कन्नै अज्ज महाशिवरात्रि मनाई जा करदी ऐ। संभाग च भगवान शिवें दे मंदरें च बड्डुले मूंह न्हरे थमां गै भक्तें दी भीड लग्गी दी ऐ। शिवरात्रि, जेदे शब्दे दा मतलब ऐ शिवें दी रात। एहू हिंदू त्यौहार दे सब्भनें महत्वें आहले त्यौहारें इचा इक्क ऐ जेडा आमतौरा पर हर बरे फौगन म्हीने दी कृष्ण पक्ख दी चौदहवीं तिथ पर मनाया जंदा ऐ। हिंदू पौराणिक कथाएं मताबक इस ध्याडे पवित्र शिवलिंग पर दुध, जल, बिल पत्तर ते भंग चाढने दा टकोहदा महत्व ऐ। शिवरात्रि जिसी हैरथ दे नां कन्नै बी जानेया जंदा ऐ, कश्मीरी पंडत समुदाय बश्कार खास महत्व रखदी ऐ। पंडित समुदाय केई हफ्तें तगर इस त्यौहार गी मनांदा ऐ। उत्सव दौरान ओहू टकोहदी सब्जियें दे सवादले पकवान बनांदे न ते हर ध्याडे भगवान शिव दी पूजा करने ताई टकोहदे नाएं आहले दिन तय करदे ना। जम्मू जिले दे जानीपुर इलाके च आप शम्भू मंदर ते सर्कुलर रोड पर

पीर खो मंदिर च शिव भक्तें दियां लम्मियां रींगां दिक्खियां जंदियां ना। इस मौके पर नेकें थाहरें लंगें दा बी सरिस्ता कीता गेदा ऐ।

<><><><><><>

Mahakumbh

अज्ज महाशिवरात्रि दे मौके पर प्रयागराज च महाकुम्भ मेला 2025 सम्पन्न होई जाग। पूरे मुल्खै थमां आए दे श्रद्धालु अज्ज बड्डलै सवेला थमां संगम ते प्रयागराज दे दुए घाटें च पवित्र स्नान करा रदे ना। महाकुम्भ मेला 13 जनवरी गी रम्भ होआ हा ते पिछले 6एं हफ्तें च 64 करोड़ 60 लक्ख थमां बी मते श्रद्धालुएं प्रयागराज संगम च पवित्र स्नान कीता। इस महाकुम्भ दौरान दुनिया भरै च मानवता दा सभनें शा बड्डा किट्टु लग्गा ऐ।

<><><><><><>

Tech. Award

इंडिया एक्सप्रेस ग्रुप नै टेक्नॉलजी सभा ते पुरस्कार दे अपने 37में संस्करण च जम्मू-कश्मीर दे सूचना प्रौद्योगिकी मैहकमे गी औंदे ई-उन्नत प्रोजेक्ट ताई प्रौद्योगिकी पुरस्कार 2025 प्रदान कीता गेआ ऐ। ई-उन्नत टकोहदे तौरा पर जम्मू-कश्मीर दे आई.टी मैहकमें आसेआ विकसित कीते गेदा एकीकृत पोर्टल ऐ जेदा मकसद आम लोकें दी सरकारी सेवां तगर सखल्लै गै पुज्ज बनाना ऐ। ई-उन्नत पोर्टल पर 1164 आनलाइन सेवां गी 100 फीसदी उपलब्ध करोआइयै जम्मू-कश्मीर नै बिजन रूकावट दे डिजिटल सेवा वितरण च इक राश्ट्री मानक स्थापित कीता ऐ।

<><><><><><>

Weather

जम्मू-कश्मीर दियें उप्परलियें धारें पर ताजा बर्फबारी दर्ज कीती गेई जिल्ले के घाटी दे पदरे इलाकें ते जम्मू खित्ते दे नेकें हिस्सें च कल मंगलवारें गी बरखा बरी जेदे कननै दिनें दे तापमान च मती गिरावट आई। मशहूर स्की रिकसार्ट गुलमर्ग, सोनमर्ग ते दुधपत्थरी सने कश्मीर दियें पहाड़ियें पर ताजा बर्फबारी होई। गुलमर्ग ते सोनमर्ग च 6 इंच दुध पत्थरी च 5, सिंथनटाम्प ते पीर की गली च 4 इंच बर्फबारी दर्ज कीती गेई।

<><><><><><>